



UNIVERSITÄTS-  
BIBLIOTHEK  
PADERBORN

# **Dissertationes Ad Jus Publicum Romano-Ecclesiasticum**

**Bessel, Johann Franz**

**Coloniæ, 1715**

**VD18 14847493**

§. VII. De Potestate Summi Pontificis Remissiva Sive Concedendi  
Indulgentias.

---

[urn:nbn:de:hbz:466:1-61383](https://nbn-resolving.org/urn:nbn:de:hbz:466:1-61383)

## §. VII.

DE POTESTATE SUMMI PONTIFICIS REMISSIVA  
SIVE CONCEDENDI INDULGENTIAS.

## SUMMARI A.

1. *Quid sint indulgentia.* 2. *An per indulgentias derogetur meritis Christi?* 3. *Indulgentia quotuplices sint?* 4. *Jubileum quid sit?* 5. *Indulgentia alia reales, alia locales, personales.* 6. *Quis concedere possit indulgentias?* 7. *Quid operentur indulgentia?* 8. *An summus Pontifex possit etiam pro defunctis concedere indulgentias?*

Potestatem coercendi delinquentes bene sequitur potestas remittendi pœnas spirituales temporales, DEO pro peccatis debitas, sive potestas concedendi indulgentias. Hinc

1. *Quæres 1. Quid est indulgentia?*

Resp. Remissio sive indulgentia est condonatio satisfactionis, sive temporalis pœnæ DEO debita pro peccatis. *c. 4. de pœnit. & remiss. c. 3. eod. in 6.*

Quod verò Ecclesia ex potestate clavium sibi à Christo *Matth 16.* traditarum solvit seu remittit in terris, solum etiam est in cœlis. hanc autem remissionem facit Ecclesia per singularem applicationem meritorum Christi & sanctorum ejus; nam licet Christus infinite DEO Patri suo satisfecerit pro peccatis omnibus, tamen hæc satisfactio non prodest ad remissionem peccatorum, nisi quatenus alicui applicatur vel immediate per ipsum

Christum, vel perceptionem sacramentorum, vel per Vicarium Christi Romanorum Pontificem; aliàs enim si Christus per solam satisfactionem voluisset omnibus indistinctè omnia sua peccata remittere, & securam salutem conferre, frustra peccatores non agentes fructus dignos pœnitentiæ à regno cœlorum in multis Evangelii locis exclusisset, frustra Pastori Ecclesiæ, claves ad ligandum & solvendum concessisset. &c.

Si dicas cum Protestantibus; per fictitiam indulgentiarum concessionem multum derogatur meritis Christi, quæ Pontifices insufficientia arguunt ad satisfaciendum pro peccatis totius mundi, qui tamen pro omnibus mortuus & omnes redemit.

Resp. Christum non tantum sufficienter, sed abundantissime pro peccatis nostris satisfecisse, illa ipsa tamen satisfactio Christi nobis debet per



per dispensationem Ecclesiæ & propriam nostram cooperationem immediatè applicari, imo etiam opera nostra satisfactoria non aliter vim & effectum habent, quam ex satisfactione Christi, à quo offeruntur Patri, & per quem acceptantur à Patre. ita declaravit *Trident. sess. 14. c. 8. de sacrament. pœnit.*

5. Quares 2. *Quotuplices sint indulgentiæ?*

Resp. indulgentiæ aliæ sunt totales sive plenariæ, aliæ partiales; priores sunt, per quas remittitur tota pœnitentia & satisfactio sive in hoc sive in altero sæculo sustinenda; posteriores sunt, per quas tantum pars aliqua pœnitentiæ, ut si indulgentia unius sit anni, vel septennii, vel 40. dierum, (quæ in Canonibus Carena dicitur *c. 18. de accusat.*) peragenda fuisset.

Indulgentiæ plenariæ subdividi possunt in plenarias simpliciter, quæ solam pœnam delent, & in Jubilæum, quod alia quoque privilegia adjuncta habet, nimirum potestatem absolvendi à censuris, à casibus reservatis, commutandi vota &c. & pro hoc ab Ecclesia institutus est annus Jubilæi, qui ante tempora Bonifacii VIII. & juxta ejus constitutionem erat annus quilibet sæcularis, sive centesimus. *Extravag. 1. de pœnit. & remiss. inter comm.* Deinde per *Clement. 6. & Extravag. 2. eod.* reductus est ad annum quinquagesimum, & denique per Paulum II. & Sixtum IV. determinatus est annus vigesimus

quintus. *Extravag. 4. eod.* Atque ita hodie servatur, ut recurrente semper cujusque sæculi anno 25. à primis vesperis Nativitatis usque ad primas easdem vespervas sequentis anni per totum annum Romæ celebretur Jubilæum, omnibusque Romam ad limina Apostolorum venientibus tribuatur plenissima remissio peccatorum, suspensis interim extra urbem omnibus indulgentiis plenariis pro vivis concessis, *d. Extravag. 4.* quæ tamen anno Jubilæi elapso eoispo extra Romam suum vigorem recuperant. *Layman. in Theolog. moral. Lib. 5. tr. 7. c. 8.*

Solent etiam præter hoc Jubilæum ex speciali summi Pontificis concessione plenariæ indulgentiæ ad instar Jubilæi ad certum tempus in partibus nostris concedi, quarum modus ex tenore Bullæ concessionis desumi & observari debet.

Dividuntur ulterius indulgentiæ, in personales, reales & locales. Personales directè dantur personis abstrahendo à loco *v. gr.* religiosis, fodalibus. Reales conceduntur alicui signo mobili *v. gr.* rosariis, nummismatibus, imaginibus. Locales tribuuntur certis locis & templis, non quod ea sint capacia, sed homines in talibus locis, visitatio tamen ejusmodi loci est conditio ad lucrandas tales indulgentias. Cæterum de his idem dicendum, quod de privilegiis traditur, nempe quod sequuntur personas, res aut loca, quibus conceduntur.

T

Circa



Circa indulgentias reales, quæ nummismatibus & aliis signis sacris à summo Pontifice dari solent, vel immediatè, vel delegata alicui personæ potestate indulgentias applicandi, hodie ex Decreto Innocentii X. servatur, ut tales indulgentiæ non egrediantur tertiam manum, ita ut impetrans *v. gr.* nummisma, quod indulgentiam habet, primus possit dari alteri, & iste tertio, sed ab hoc si transferatur ad alium, pereant indulgentiæ.

Quæres 3. *Quis concedere possit indulgentias?*

6 Resp. Indulgentiarum concessio primo & principaliter ad summum Pontificem spectat, cujus est dispensare thesaurum Ecclesiæ ex meritis Christi & sanctorum collectum, *Extravag. 2. de penit. & remiss. inter commun.* Dixi primo & principaliter: equidem per speciale privilegium etiam inferioribus Prælatibus potest à summo Pontifice concedi jus dandi indulgentias, sicut concessum est Episcopis in dedicatione Ecclesiæ unius anni, & in anniversario ejusdem dedicationis 40. dierum indulgentiam dare & non non amplius, sive ab uno sive à pluribus Episcopis Ecclesia consecratur. *c. 14. de penit. & remiss.* & sicut remissio sive indulgentiæ sunt actus jurisdictionis, sic solus Pontifex habens jurisdictionem universalem in totum mundum, etiam toti mundo ac omnibus indulgentias concedere potest; è contra verò cum Episcoporum li-

mitata sit jurisdictio & illud privilegium concedendi indulgentias, ideoque tales indulgentiæ non profunt nisi subditis concedentis, alienis vero tunc solum, si à propriis suis ordinariis habuerint licentiam alienæ jurisdictioni & remissioni se subjiciendi, nam prorogatio jurisdictionis in spiritualibus fieri non potest absque proprii judicis & pastoris consensu. *c. 4. de penit. & remiss. P. Engel, n. 17. eod. tit.*

Quæres 4. *Quid operentur indulgentia?*

7 Resp. Si indulgentiæ sint plenariæ, pœnæ pro peccatis debitæ totaliter remittuntur, si verò sint partiales, quales sunt indulgentiæ certi temporis *v. gr.* unius anni, habent efficaciam ad delendam pœnam tantæ temporis, non solum illam, quæ per pœnitentiam unius anni in vita factam ex pœnis purgatorii deleretur. D. Robertus König. *§. 5. n. 31. de penit. & remiss.*

Quæres 5. *An summus Pontifex non tantum pro vivis sed etiam pro defunctis possit indulgentias concedere?*

8 Resp. 1. Pontifex nequit defunctis concedere indulgentias ex vi jurisdictionis, quia in mortuos nullam habet.

Resp. 2. Summus Pontifex potest concedere indulgentias per modum suffragii defunctis applicandas, cum Christus thesaurum Ecclesiæ æque pro defunctis quam vivis dispertiendum summo Pastori reliquerit, regulariter tamen indul-



dulgentiæ à summo Pontifice concessæ, non possunt applicari defunctis, nisi hoc sit specialiter in Bulla expressum. D. König. *d. l. n. 28.* plura quæ requirantur ex parte illius, qui cupit indulgentias

lucrari, passim traditur à Theologis & Canonistis, neque hujus tractationis hic est, cum sufficiat delibasse potestatem concedendi indulgentias.

## DISSERTATIO III.

DE

### ELECTIONE ET CORONATIONE SUMMI PRINCIPIS ECCLESIASTICI.

**P**ostquam actum est de dignitate & varia potestate summi Pontificis, congruus ordo postulat, ut sub censuram vocetur ipsamet electio Pontificia, quis nimirum ad hujus solii sublimitatem possit ascendere, aut quinam possint ad hujus Ecclesiasticæ Majestatis apicem idoneum eligere & eligendo elevare.

#### §. I.

#### QVID SIT ELECTIO PONTIFICIA, ET CUI JURI ORIGINEM SUAM DEBEAT?

#### SUMMARIA.

1. *An sit juris divini, ut Pontifex assumatur per Electionem?* 2. *Solvuntur objectiones.* 3. *An S. Clemens fuerit à D. Petro denominatus successor in*

*Pontificatu.* 4. *An Bonifacius II. Vigiliam. Gregorius VII. Victorem III. & idem Victor Urbanum II. sibi successores in Pontificatu substituerint?*

Quæres 1. *Quid sit Electio Pontificia?*

Electio ex communi definitione

describi potest, quod sit assumptio personæ idoneæ ad Prælaturam Ecclesiæ viduatæ per eos, qui jus suffragii

T 2